

სსიპ ილიას სახელმწიფო უნივერსიტეტის
ბიზნესის, ტექნოლოგიისა და განათლების ფაკულტეტის
სადისერტაციო საბჭოსა და დოქტორანტურის დებულება

მუხლი 1. ზოგადი დებულებები მოქმედების სფერო და მიზნები

1.1. ეს დებულება განსაზღვრავს ილიას სახელმწიფო უნივერსიტეტის ბიზნესის, ტექნოლოგიისა და განათლების ფაკულტეტის (შემდგომში ფაკულტეტი) სადოქტორო პროგრამებზე მიღების პროცედურებს, ხელმძღვანელის/თანახელმძღვანელის და რეცენზენტების შერჩევის წესებს და მათ ფუნქცია-მოვალეობებს, სადისერტაციო საბჭოს შედგენისა და საქმიანობის წესს, დოქტორის კვალიფიკაციის/აკადემიური ხარისხის მინიჭების კრიტერიუმებს, სადისერტაციო ნაშრომის დაცვის წესს, ხოლო ამ საკითხებთან დაკავშირებული დავების წარმოშობის შემთხვევაში, მათი გადაჭრისა და მიღებული გადაწყვეტილების გასაჩივრების წესს და სადოქტორო პროგრამის დაგეგმვასა და განხორციელებასთან დაკავშირებულ სხვა მნიშვნელოვან საკითხებს.

1.2. დოქტორანტურის ძირითადი ამოცანაა, უნივერსიტეტის მისიის შესაბამისად, ხელი შეუწყოს:

- ა) უნივერსიტეტის სასწავლო და კვლევითი პოტენციალის განვითარებას;
- ბ) საკვლევო თემატიკის გათვალისწინებით ინტერდისციპლინური მიდგომების გამოყენებით თანამშრომლობას;
- გ) დარგობრივი, სამეცნიერო ხასიათის თანამშრომლობის/პროფესიული ქსელის ჩამოყალიბებას.

1.3. სადოქტორო პროგრამის კურსდამთავრებულს ენიჭება დოქტორის კვალიფიკაცია/აკადემიური ხარისხი, იმ შემთხვევაში, თუ მან:

- ა) განახორციელა ორიგინალური კვლევა, რომელიც აფართოებს ცოდნის საზღვრებს და რომლის შედეგებიც გამოქვეყნდა სამეცნიერო სტატიის სახით სამეცნიერო პერიოდულ გამოცემებში, რომელიც შეესაბამება ამავე დებულებაში მოყვანილ მოთხოვნებს;
- ბ) წარმატებით შეასრულა პროგრამით განსაზღვრული ყველა სხვა მოთხოვნა.

1.4 სადოქტორო საგანმანათლებლო პროგრამების შემუშავების საფუძველს წარმოადგენს უნივერსიტეტში არსებული კვლევითი პოტენციალი, შესაბამისი მიმართულებით წინარე სამეცნიერო საქმიანობის გამოცდილების არსებობა, წარმატებული პრაქტიკა და კვლევის შედეგები. პროგრამები ხორციელდება ფაკულტეტზე/უნივერსიტეტში არსებული სამეცნიერო-კვლევითი ერთეულების ბაზაზე;

1.5 სადოქტორო პროგრამის ფარგლებში მიმდინარე კვლევები ხორციელდება უნივერსიტეტში მოქმედი კვლევის ეთიკის ნორმების შესაბამისად, რომელიც ითვალისწინებს შესაბამის სფეროში მოქმედ კვლევის ეთიკის ადგილობრივ და საერთაშორისო სტანდარტებს.

- 1.6 სფეროს სპეციფიკის გათვალისწინებით, ფაკულტეტი სადოქტორო პროგრამის ფარგლებში თანამშრომლობს ადგილობრივ და უცხოურ სამეცნიერო-კვლევით ინსტიტუტებთან/ცენტრებთან/უსდ - ებთან, სადოქტორო სკოლებთან, ასევე, საჯარო და კერძო სექტორთან/ინდუსტრიასთან და სხვა პოტენციურ დამსაქმებელთან;
- 1.7 სადოქტორო საგანმანათლებლო პროგრამის განხორციელებაში ჩართული აკადემიური/სამეცნიერო პერსონალის კვალიფიკაცია დასტურდება ბოლო 3 წლის განმავლობაში საერთაშორისო ინდექსის მქონე რეფერირებად (peer-reviewed) ჟურნალში გამოქვეყნებული სამეცნიერო ნაშრომით, რომელიც ადასტურებს შესაბამის სფეროში მის კომპეტენტურობას. გამონაკლისს შესაძლებელია წარმოადგენდეს მხოლოდ ტრანსფერული უნარების განმავითარებელი კომპონენტები, სადაც პერსონალის კომპეტენცია შესაძლებელია დადასტურდეს შესაბამის სფეროში შესრულებული პრაქტიკული გამოცდილებით. აღნიშნული გამონაკლისი არ ვრცელდება პროგრამის ისეთ კომპონენტებზე, როგორც არის დარგობრივი და მეთოდოლოგიური კურსები;
- 1.8 ფაკულტეტი შესაძლოა ახორციელებდეს სადოქტორო საგანმანათლებლო პროგრამებს საერთაშორისო თანამშრომლობის ფარგლებში, რომელიც ითვალისწინებს სტუდენტების გაცვლას ან ერთობლივი (joint, double) კვალიფიკაციის/ხარისხის მინიჭებას.

მუხლი 2. დარგობრივი კომისია

- 2.1. დარგობრივი კომისიები იქმნება ფაკულტეტის საბჭოს მიერ, ფაკულტეტის დებულებით განსაზღვრული წესის შესაბამისად, დარგის და მიმართულებების მიხედვით და შედგება უნივერსიტეტის დოქტორის აკადემიური ხარისხის მქონე პროფესორებისაგან, ასოცირებული პროფესორებისა და ასისტენტ-პროფესორებისგან. დარგობრივი კომისიის წევრებს უნდა უდასტურდებოდეს ინგლისური ენის კომპეტენცია. მისი თავმჯდომარე და მდივანი აირჩევა ყოველი სხდომისთვის კომისიის შემადგენლობიდან ღია კენჭისყრით;
- 2.2. დარგობრივი კომისია მონაწილეობს დოქტორანტურაში მიღებასთან და სწავლასთან დაკავშირებულ პროცესებში, როგორცაა:
- ა) დოქტორანტურაში ჩაბარების მსურველების კვლევითი განაცხადების განხილვა და შეფასება, მათთან ზეპირი გამოცდის ჩატარება;
 - ბ) დოქტორანტის სამეცნიერო ხელმძღვანელ(ებ)ის, თანახელმძღვანელ(ებ)ის დამტკიცება; დოქტორანტის მიერ ხელმძღვანელის/თანახელმძღვანელის შეცვლის/დამატების ან მისი სამეცნიერო ხელმძღვანელის მიერ ხელმძღვანელობაზე უარის განაცხადების განხილვა და გადაწყვეტილების მიღება;
 - გ) პროსპექტუსის დაცვა;
 - დ) კოლოკვიუმების ფარგლებში დოქტორანტების პროგრესის შეფასება და მათთვის უკუკავშირის მიწოდება მათ ანგარიშებთან და პრეზენტაციასთან დაკავშირებით;

- ე) სადისერტაციო საბჭოს წევრთა სიის, თავმჯდომარის კანდიდატურის და მისი არყოფნის შემთხვევაში - თავმჯდომარის მოვალეობის შემსრულებლის კანდიდატურის წარდგენა ფაკულტეტის საბჭოსათვის;
- ვ) სადისერტაციო ნაშრომის შეფასებისთვის რეცენზენტების შერჩევა და წარდგენა ფაკულტეტის საბჭოსათვის;
- ზ) დოქტორანტის პუბლიკაციის მის სადისერტაციო თემასთან შესაბამისობის დადგენა და შესაბამისი დასკვნის წარდგენა დეკანისთვის, უნივერსიტეტის ხარისხის უზრუნველყოფის სამსახურისათვის წარდგენის მიზნით;
- თ) დოქტორანტის მიერ საკვლევი თემის სათაურის, კვლევის თემატიკის ან მიმართულების შეცვლის განაცხადის განხილვა და გადაწყვეტილების მიღება;
- ი) დოქტორანტის სტატუსის აღდგენის შემთხვევაში, მისი კვლევითი თემატიკის აქტუალობის განხილვა დოქტორანტის ხელმძღვანელის წარდგინების, დოქტორანტის კვლევითი განაცხადის, მატერიალური/ინტელექტუალური რესურსების გამოყენების შესახებ პარტნიორი ორგანიზაციის თანხმობის (საჭიროების შემთხვევაში), დაცული პროსპექტუსის ან/და დოქტორანტის მიერ გამოქვეყნებული სამეცნიერო პუბლიკაციების საფუძველზე. აღნიშნული პროცედურა ეხება იმ დოქტორანტებს, რომლებსაც 2 სასწავლო სემესტრით და უფრო ხანგრძლივი პერიოდით ჰქონდა სტატუსი შეჩერებული;
- კ) ქართულენოვანი სადოქტორო პროგრამების სტუდენტთა სადისერტაციო ნაშრომის ინგლისურ ენაზე შესრულებისა და დაცვის შესახებ გადაწყვეტილების მიღება;

2.3. საერთაშორისო შეთანხმებით ან/და სხვა პარტნიორული ხელშეკრულების შემთხვევაში შესაძლებელია დადგინდეს ამ მუხლით განსაზღვრული პირობებისგან განსხვავებული პირობები.

მუხლი 3. დოქტორანტურაში მიღება

- 3.1. დოქტორანტურაში სწავლის უფლება აქვს მაგისტრის ან მასთან გათანაბრებული აკადემიური ხარისხის მქონე პირს.
- 3.2. დოქტორანტურაში მიღებას, ფაკულტეტის საბჭოს ან დეკანის წარდგინების საფუძველზე, აცხადებს რექტორი. მიღება შეიძლება გამოცხადდეს როგორც შემოდგომის, ისე გაზაფხულის სემესტრისათვის. ინფორმაცია სადოქტორო პროგრამებზე მიღების პირობების, ვადებისა და წარსადგენი დოკუმენტების შესახებ ქვეყნდება ილიას სახელმწიფო უნივერსიტეტის ვებგვერდზე;
- 3.3. დოქტორანტურაში სწავლის მსურველმა უნდა წარმოადგინოს შემდეგი დოკუმენტები:
 - ა) შევსებული სააპლიკაციო ფორმა;
 - ბ) პირადობის დამადასტურებელი დოკუმენტი;
 - გ) მაგისტრის ან მასთან გათანაბრებული აკადემიური ხარისხის ფლობის დამადასტურებელი საბუთის ასლი (ხუთწლიანი უმაღლესი განათლების დიპლომის ან უცხოეთში მიღებული განათლების დამადასტურებელი დიპლომის შესაბამისობა დადასტურებული უნდა იყოს განათლების ხარისხის განვითარების ეროვნული ცენტრის მიერ);

დ) ავტობიოგრაფია (CV);

ე) 3X4-ზე ფოტოსურათის ელ. ვერსია;

ვ) კანდიდატის მიერ შევსებული და მისი პოტენციური ხელმძღვანელის ხელმოწერილი კვლევითი განაცხადი და თანხმობის ფორმა ქვეყნდება უნივერსიტეტის ვებგვერდზე, პროგრამაზე ყოველი მიღების გამოცხადებისთანავე);

ზ) პარტნიორი ორგანიზაციის რესურსების გამოყენების შემთხვევაში, ორგანიზაციის თანხმობის ფორმა, ხელმოწერილი მისი წარმომადგენლის მიერ;

თ) კვლევითი უნარების დადასტურების მიზნით: შესაბამის სფეროში წინარე ნაშრომი/პუბლიკაცია ან/და სამეცნიერო-კვლევით პროექტებსა და ღონისძიებებში მონაწილეობა ან/და შესაბამის სფეროში მუშაობის არანაკლებ 2 წლიანი გამოცდილება. კონკრეტული მოთხოვნები განსაზღვრულია თითოეული პროგრამის მიღების წინაპირობებში.

ი) ინგლისური ენის მინიმუმ B2 დონის ფლობის დამადასტურებელი საერთაშორისო დოკუმენტი, რომლის მოთხოვნები განსაზღვრულია კონკრეტული პროგრამის მიღების დოკუმენტში (ასეთის არსებობის შემთხვევაში);

კ) სამხედრო აღრიცხვაზე ყოფნის დამადასტურებელი დოკუმენტი (მხოლოდ ვაჟებისთვის);

ლ) სხვა დოკუმენტები/პირობები, რომელსაც შეიძლება ითხოვდეს ცალკეული პროგრამა.

3.4. მიღების პროცედურები

3.4.1 საბუთების შემოწმების შემდეგ ფაკულტეტის ადმინისტრაცია განიხილავს კანდიდატის ინგლისური ენის კომპეტენციის დამადასტურებელ დოკუმენტებს. იმ შემთხვევაში, თუ წარმოდგენილი დოკუმენტებით ვერ დგინდება ინგლისური ენის მინიმუმ B2 დონეზე ფლობა, დოქტორანტობის კანდიდატი აბარებს უნივერსიტეტის მიერ ორგანიზებულ გამოცდას ინგლისურ ენაში (მინიმუმ B2 დონე). ტესტირების მინიმალური ზღვარი დგინდება ყოველი პროგრამისთვის ინდივიდუალურად, მიეთითება პროგრამაზე მიღების პირობებში და მიღების გამოცხადების შესახებ ფაკულტეტის წარდგინებაში;

3.4.2 ინგლისური ენის გამოცდისგან თავისუფლდებიან ის კანდიდატები, რომლებიც წარმოადგენენ ინგლისური ენის ცოდნის დამადასტურებელ ვალიდურ საერთაშორისო სერტიფიკატს/დოკუმენტს. გამოცდისგან ტესტისაგან თავისუფლდებიან აგრეთვე ის კანდიდატები, რომლებიც წარმოადგენენ საქართველოს ფარგლებს გარეთ ინგლისურენოვანი საბაკალავრო ან სამაგისტრო პროგრამის დასრულების დამადასტურებელ დიპლომს (დიპლომთან ერთად წარმოდგენილი უნდა იყოს განათლების ხარისხის ეროვნული ცენტრის მიერ გაცემული დოკუმენტი - უცხოეთში მიღებული განათლების აღიარების შესახებ). ასევე, ის პირები, რომლებიც წარმოადგენენ საქართველოში ინგლისურენოვანი საბაკალავრო ან სამაგისტრო

პროგრამის დასრულების დამადასტურებელ დიპლომს და დანართს ან ცნობას პროგრამის განხორციელების ენის შესახებ;

3.4.3 ინგლისური ენის ცოდნის დამადასტურებელი ვალიდური სერტიფიკატების/დოკუმენტის შესაბამისი დონეები და ქულები გაწერილია ცალკეული პროგრამების მარეგულირებელ დოკუმენტებში;

3.4.4 ინგლისური ენის გამოცდის წარმატებით ჩაბარების ან ცოდნის დადასტურების შემდეგ ხდება კანდიდატის მიერ წარმოდგენილი კვლევითი განაცხადის და მისი კვლევითი უნარების შეფასება, რისთვისაც შესაბამისი დოკუმენტები იგზავნება შესაბამისი დარგობრივი კომისიის წევრებთან. იმ შემთხვევაში, თუ კანდიდატის პოტენციური ხელმძღვანელი ამავდროულად წარამოადგენს დარგობრივი კომისიის წევრს, ის კანდიდატის შეფასებაში მონაწილეობას არ იღებს. კვლევითი განაცხადის მოთხოვნები, შეფასების კრიტერიუმები და რუბრიკები დგინდება ყოველი პროგრამისთვის ინდივიდუალურად და განთავსდება უნივერსიტეტის ვებგვერდზე ყოველი მიღების გამოცხადებისთანავე. დამაკმაყოფილებელი შეფასების მიღების შემთხვევაში, კანდიდატი ამავე დარგობრივ კომისიასთან აბარებს ზეპირ გამოცდას;

3.4.5 დარგობრივი კომისიის მიერ ზეპირი გამოცდის შეფასება ხდება წინასწარ განსაზღვრული მოთხოვნების, კრიტერიუმების და რუბრიკების მიხედვით, რომელიც ყოველი პროგრამისთვის დგინდება ინდივიდუალურად და მიღების გამოცხადებისთანავე ქვეყნდება უნივერსიტეტის ვებგვერდზე;

3.4.6 დოქტორანტის მიერ მიღებული შეფასებები ეტაპობრივად ქვეყნდება უნივერსიტეტის ვებ გვერდზე პერსონალური მონაცემების დაცვის უზრუნველყოფით.

3.4.7 დოქტორანტს აქვს უფლება, გაასაჩივროს მიღებული შეფასებები მათი გამოქვეყნებიდან 2 სამუშაო დღის განმავლობაში. ინფორმაცია სააპელაციო პროცედურების შესახებ მითითებულია უნივერსიტეტის რექტორის ბრძანებაში და ქვეყნდება უნივერსიტეტის ვებგვერდზე. საპრეტენზიო განაცხადს განიხილავს შესაბამისი სააპელაციო კომისია, რომელიც წინასწარ მტკიცდება ფაკულტეტის საბჭოს მიერ. გასაჩივრების შედეგები ქვეყნდება უნივერსიტეტის ვებგვერდზე პერსონალური მონაცემების დაცვის უზრუნველყოფით.

3.4.8 სადოქტორო პროგრამის კანდიდატის ერთიანი სარეიტინგო ქულა დაანგარიშდება სადოქტორო პროგრამაზე მიღების დოკუმენტში განსაზღვრული წესის შესაბამისად. ხოლო შეფასების შედეგები განთავსდება უნივერსიტეტის ვებგვერდზე;

3.4.9 პარტნიორული, ადგილობრივი ან საერთაშორისო თანამშრომლობის შემთხვევაში, შესაძლებელია დადგინდეს 3.2. მუხლის ზ) პუნქტით განსაზღვრულისგან განსხვავებული მოთხოვნები.

მუხლი 4. დოქტორანტის ხელმძღვანელ(ებ)ი/თანახელმძღვანელი

4.1. დოქტორანტის პოტენციური ხელმძღვანელ(ებ)ის შერჩევა ხდება სადოქტორო პროგრამაზე მიღების პერიოდში და მისი/მათი ხელმძღვანელობის სურვილი დასტურდება თანხმობის შესაბამის ფორმაზე ხელმოწერით;

4.2. დოქტორანტის ხელმძღვანელი, ასევე რამდენიმე ხელმძღვანელის არსებობის შემთხვევაში, მინიმუმ ერთი ხელმძღვანელი, წარმოადგენს დოქტორის/დოქტორთან გათანაბრებული ხარისხის მქონე, უნივერსიტეტის აკადემიურ (პროფესორი, ასოცირებული პროფესორი) ან/და სამეცნიერო პერსონალს;

4.3 დოქტორანტის სამეცნიერო ხელმძღვანელ(ებ)ის საკვალიფიკაციო მოთხოვნები:

ა) აქვს შესაბამისი სფეროში აკადემიური ხარისხი;

ბ) დოქტორანტის საკვლევი სფეროს შესაბამისი სამეცნიერო-კვლევითი გამოცდილება, აქტიური მონაწილეობა აქვს მიღებული სამეცნიერო კვლევებში და ბოლო 3 წლის განმავლობაში გამოქვეყნებული აქვს სულ მცირე 1 სამეცნიერო ნაშრომი უცხოურ თემატურ საერთაშორისო ინდექსის მქონე რეფერირებად (peer-reviewed) ჟურნალში, რომელიც ბიზნესის და ადმინისტრირების და განათლების მიმართულების შემთხვევაში შესულია აღიარებულ საერთაშორისო ნუსხებში - Clarivate Analytics (ყოფილი Thomson Reuters) Master Journal List, Scopus, Ulrich's Index, ERIH PLUS, EBSCOHost, Latindex Catalogue), ხოლო მათემატიკის შემთხვევაში - Clarivate Analytics Web of Science - ის ბაზაში შემაჯალ 0.5-ზე მაღალი იმპაქტ-ფაქტორის მქონე (საერთაშორისო) თემატურ ჟურნალში ან Scopus-ის ნუსხაში შემაჯალ 0.5-ზე მაღალი ციტირების ქულის (CiteScore) მქონე (საერთაშორისო) თემატურ ჟურნალში. გამოქვეყნებული ნაშრომი შეესაბამება დოქტორანტის სადისერტაციო ნაშრომის ზოგად თემატიკას/მიმართულებას;

გ) აქვს დოქტორანტის ხელმძღვანელობის/თანახელმძღვანელობის გამოცდილება ან გავლილი აქვს შესაბამისი ტრენინგი/სემინარი სამეცნიერო ხელმძღვანელობის ეფექტურობის გასაძლიერებლად;

დ) იმ შემთხვევაში, თუ სადისერტაციო ნაშრომის შესრულება და დაცვა ხდება ინგლისურ ენაზე, სამეცნიერო ხელმძღვანელს უნდა ჰქონდეს ინგლისური ენის კომპეტენციაც აღნიშნული კომპეტენციის დადგენა წარმოადგენს შესაბამისი დარგობრივი კომისიის კომპეტენციას და ვალდებულებას;

4.4. სადოქტორო პროგრამაზე კანდიდატის ჩარიცხვის შემთხვევაში, ხელმძღვანელ(ებ)ს, თანახელმძღვანელს (არსებობის შემთხვევაში), დოქტორანტსა და უნივერსიტეტს შორის ფორმდება სამმხრივი შეთანხმება, რომელშიც განსაზღვრულია თითოეული მხარის უფლება-მოვალეობები;

4.5. შესაძლებელია დოქტორანტის მეორე ხელმძღვანელი მოწვეული იყოს სხვა, მათ შორის უცხო ქვეყნის, აკადემიური დაწესებულებიდან, საერთაშორისო თანამშრომლობის შეთანხმების ფარგლებში ან დარგობრივი კომისიის გადაწყვეტილებით. მეორე ხელმძღვანელი უნდა აკმაყოფილებდეს 4.3 პუნქტში ხელმძღვანელისთვის განსაზღვრულ ყველა საკვალიფიკაციო მოთხოვნას; რამდენიმე ხელმძღვანელის არსებობის შემთხვევაში სადოქტორო ხარისხის და აკადემიური თანამდებობის მოთხოვნა ვრცელდება მხოლოდ ერთ-ერთ ხელმძღვანელზე;

4.8. სამეცნიერო ხელმძღვანელის ძირითადი ფუნქციები და მოვალეობებია:

ა) კვლევით პროცესში დოქტორანტთან რეგულარული კონსულტაციები კვლევის მეთოდოლოგიურ, სტრუქტურულ, კონცეპტუალურ და სხვა საკითხებზე, კერძოდ:

- კვლევის დიზაინის და რელევანტური მეთოდოლოგიის შერჩევა;
- პროექტის მენეჯმენტი;
- თეზისის/სამეცნიერო-კვლევითი ნაშრომის/დისერტაციის წერის პროცესი
- ადგილობრივ და საერთაშორისო სამეცნიერო ქსელში ინტეგრირების პროცესი
- ადგილობრივ და საერთაშორისო სამეცნიერო ღონისძიებებში (მათ შორის, სადოქტორო კოლოკვიუმებში) მონაწილეობისა და შედეგების წარდგენის პროცესი;
- სამეცნიერო ეთიკის საკითხები;
- პროფესიული განვითარება;
- სამეცნიერო სტატიების რეფერირებად ჟურნალში გამოქვეყნება.

ბ) დოქტორანტის სამეცნიერო-კვლევითი კომპონენტის თანმიმდევრულად შესრულების პროგრესის პერიოდული დაკვირვება, განმავითარებელი შეფასება და უკუკავშირის მიცემა.

კონსულტაციების სიხშირე და პერიოდულობა განისაზღვრება ინდივიდუალურად, კვლევის სპეციფიკიდან და დოქტორანტის საჭიროებებიდან გამომდინარე.

4.9. სამეცნიერო ხელმძღვანელი წარმოადგენს დასრულებული სადისერტაციო ნაშრომის შესახებ დასკვნას, სადაც აფასებს მის სიახლეს, ეთიკური და აკადემიური ნორმების დაცვას და დაცვისთვის მზაობას;

4.10. დოქტორანტს შეიძლება ჰყავდეს თანახელმძღვანელი, რომლის კვალიფიკაცია უნდა შეესაბამებოდეს დოქტორანტის სადოქტორო ნაშრომის თემატიკას/კვლევის სფეროს. თანახელმძღვანელი მხარდაჭერას უწევს დოქტორანტს სამეცნიერო-კვლევითი კომპონენტის განხორციელების პროცესში ხელმძღვანელთან და დოქტორანტთან ურთიერთშეთანხმების საფუძველზე;

4.11. იმ შემთხვევაში, თუ სამეცნიერო ხელმძღვანელი/თანახელმძღვანელი უარს ამბობს დოქტორანტის ხელმძღვანელობაზე/თანახელმძღვანელობაზე, მან არგუმენტირებული, წერილობითი განცხადება უნდა წარუდგინოს ფაკულტეტის დეკანს, რომელსაც დეკანი განსახილველად წარუდგენს დარგობრივ კომისიას. იმ შემთხვევაში, თუ დარგობრივი კომისია დააკმაყოფილებს ხელმძღვანელი/თანახელმძღვანელის განცხადებას, დოქტორანტს უნიშნავს ახალ ხელმძღვანელს/თანახელმძღვანელს. დარგობრივი კომისიის შესაბამისი გადაწყვეტილება ეცნობება ხელმძღვანელს/თანახელმძღვანელს და დოქტორანტს;

4.12. სამეცნიერო ხელმძღვანელის/თანახელმძღვანელის შეცვლის სურვილის შემთხვევაში, დოქტორანტმა არგუმენტირებული მოთხოვნით, წერილობით უნდა მიმართოს ფაკულტეტის დეკანს, რომელსაც დეკანი განსახილველად წარუდგენს დარგობრივ კომისიას. იმ შემთხვევაში, თუ დარგობრივი კომისია დააკმაყოფილებს დოქტორანტის განცხადებას, დოქტორანტს უნიშნავს ახალ

ხელმძღვანელს/თანახელმძღვანელს. დარგობრივი კომისიის შესაბამისი გადაწყვეტილება ეცნობება დოქტორანტს და ახალ ხელმძღვანელს/თანახელმძღვანელს;

4.13. საერთაშორისო შეთანხმების ფარგლებში შესაძლებელია გაფორმდეს შესაბამისი შეთანხმება (მაგ. cotutelle, joint supervision agreement), რომელშიც დასაშვებია განისაზღვროს ხელმძღვანელობის ამ მუხლისგან განსხვავებული პირობები.

მუხლი 5. დოქტორანტურაში სწავლის ხანგრძლივობა და დატვირთვის მოცულობა

5.1. დოქტორანტურაში სწავლის ხანგრძლივობა არანაკლებ 3 და არა უმეტეს 5 წელია, თუ სხვა რამ არ არის გათვალისწინებული ინდივიდუალური გეგმით. იმ შემთხვევაში, თუ სტუდენტი ვერ ასრულებს პროგრამის მოთხოვნებს 5 წლის დასრულების შემდეგ, მას შეიძლება გაუფორმდეს დამატებითი, მაქსიმუმ ერთწლიანი ფასიანი ხელშეკრულება დარგობრივი კომისიის შუამდგომლობის საფუძველზე, შესაბამისი პირობების გათვალისწინებით;

5.2. სადოქტორო საფეხურის საგანმანათლებლო პროგრამის სასწავლო და კვლევითი კომპონენტები, მათი თანმიმდევრობა და მოცულობა კრედიტებში (სადაც რელევანტურია) განისაზღვრება ინდივიდუალურად, ყოველი სადოქტორო საგანმანათლებლო პროგრამისათვის;

5.3. სადოქტორო საგანმანათლებლო პროგრამის სასწავლო კომპონენტი არ უნდა აღემატებოდეს 60 კრედიტს;

5.4. პროგრამის სტრუქტურიდან გამომდინარე, დოქტორანტს დაცვამდე უნდა ჰქონდეს შესრულებული მინიმუმ ერთი კოლოკვიუმი წელიწადში. იმ შემთხვევაში, თუკი დოქტორანტმა ორჯერ არ შეასრულა კოლოკვიუმი, მას შეუწყდება სტუდენტის სტატუსი აკადემიური ჩამორჩენილობის გამო.

5.5. უნივერსიტეტში შეიძლება არსებობდეს ერთობლივი (მაგ. joint degree, double degree) სადოქტორო საგანმანათლებლო პროგრამები, რომელთა პირობები განისაზღვრება შესაბამისი დოკუმენტებით (ხელშეკრულებები, მემორანდუმები, კურიკულუმები და ა.შ.).

მუხლი 6. საერთაშორისო გამოქვეყნების ვალდებულება

6.1. დისერტაციის დაცვამდე ბიზნესის და ადმინისტრირების და განათლების მიმართულებების პროგრამის დოქტორანტს შესაბამის სფეროში გამოქვეყნებული (ან ჟურნალის რედაქციისგან მიღებული გამოსაქვეყნებლად) უნდა ჰქონდეს არა ნაკლებ ორი სამეცნიერო სტატიისა, მათ შორის მინიმუმ ერთი სტატია გამოქვეყნებული უნდა იყოს საერთაშორისო (უცხოურ) რეფერირებად თემატურ ჟურნალში/ჟურნალებში, რომლებიც აღიარებულ საერთაშორისო ნუსხებშია შესული (Clarivate Analytics (ყოფილი Thomson Reuters) Master Journal List, Scopus, Ulrich's Index, ERIH PLUS, EBSCOHost, Latindex Catalogue) სამეცნიერო პუბლიკაციაში მითითებული უნდა იყოს ილიას სახელმწიფო უნივერსიტეტის სახელი;

6.2. დისერტაციის დაცვამდე მათემატიკის მიმართულების დოქტორანტს შესაბამის სფეროში გამოქვეყნებული (ან ჟურნალის რედაქციისგან მიღებული გამოსაქვეყნებლად) უნდა ჰქონდეს სულ მცირე 2 სამეცნიერო სტატია Clarivate Analytics Web of Science - ის ბაზაში შემავალ 0.5-ზე მაღალი იმპაქტ-ფაქტორის მქონე (საერთაშორისო) თემატურ ჟურნალში ან Scopus-ის ნუსხაში შემავალ 0.5-ზე მაღალი ციტირების ქულის (CiteScore) მქონე (საერთაშორისო) თემატურ ჟურნალში. სამეცნიერო პუბლიკაციაში დოქტორანტის ავთენტურობაში მითითებული უნდა იყოს ილიას სახელმწიფო უნივერსიტეტის სახელი;

6.3. გამოქვეყნებული პუბლიკაციებიდან ბიზნესისა და ადმინისტრირების და მათემატიკის მიმართულების დოქტორანტი უნდა იყოს ორივე სამეცნიერო სტატიის პირველი ან მეორე ავტორი. ხოლო განათლების მიმართულების დოქტორანტი უნდა იყოს მინიმუმ ერთი წარმოდგენილი სამეცნიერო სტატიის (საერთაშორისო (უცხოურ) რეფერირებად (Peer-reviewed) თემატურ ჟურნალში) პირველი ავტორი, ხოლო მეორე სტატიის (ადგილობრივ ან საერთაშორისო თემატურ ჟურნალში) პირველი ან მეორე ავტორი. პუბლიკაციების სადოქტორო ნაშრომის თემასთან შესაბამისობას ადგენს დარგობრივი კომისია, რის შესახებაც დასკვნას ოქმის სახით წარუდგენს ფაკულტეტის ადმინისტრაციას. ასეთი შესაბამისობის დადასტურების შემდეგ პუბლიკაციები ეგზავნება უნივერსიტეტის ხარისხის უზრუნველყოფის სამსახურს, რომელიც ამზადებს დასკვნას ამ დებულებით განსაზღვრულ მოთხოვნებთან პუბლიკაციების შესაბამისობის შესახებ. დარგობრივი კომისიის ან უნივერსიტეტის ხარისხის უზრუნველყოფის სამსახურის უარყოფითი დასკვნის შემთხვევაში საერთაშორისო გამოქვეყნების ვალდებულება არ ჩაეთვლება დოქტორანტს დაკმაყოფილებულად.

მუხლი 7. სადისერტაციო ნაშრომის წარდგენის პროცედურა

7.1. დოქტორანტმა სადისერტაციო ნაშრომი, რომელიც შეესაბამება სამეცნიერო პუბლიკაციის სტანდარტებს და შესრულებულია ილიას სახელმწიფო უნივერსიტეტის აკადემიური სტილის ან კონკრეტული პროგრამის სადოქტორო ნაშრომის კონცეფციით განსაზღვრული, დარგისთვის რელევანტური აკადემიური სტილის შესაბამისად, ორ ნაბეჭდ ეგზემპლარად და ელექტრონული სახით უნდა წარუდგინოს ფაკულტეტის ადმინისტრაციას;

7.2. დისერტაცია შესრულებული უნდა იყოს ქართულ ან ინგლისურ ენაზე. ინგლისურ ენაზე დისერტაციის შესრულების საკითხს (გარდა ინგლისურენოვანი სადოქტორო პროგრამის შემთხვევისა) წყვეტს დარგობრივი კომისია.

7.3. დისერტაციაში ნაწილის სახით უნდა შევიდეს შემაჯამებელი აბსტრაქტი ქართულ და ინგლისურ ენაზე, რომელშიც წარმოდგენილია სადისერტაციო ნაშრომის ძირითადი სამეცნიერო შედეგები, დასაბუთებულია მათი სამეცნიერო სიახლე, ღირებულება და აქტუალობა შესაბამის სამეცნიერო დისციპლინაში.

7.4. ფაკულტეტის ადმინისტრაცია უზრუნველყოფს, რომ სადისერტაციო ნაშრომს დაერთოს:

ა) ცნობა პროგრამის მოთხოვნების შესრულების შესახებ;

ბ) დოქტორანტის მიერ ხელმოწერილი განაცხადი, რომ სადისერტაციო ნაშრომი მისი დამოუკიდებელი კვლევის შედეგია და არ შეიცავს პლაგიატს;

გ) დოქტორანტის სამეცნიერო ხელმძღვანელ(ებ)ის დასკვნა სადისერტაციო ნაშრომის დაცვისთვის მზაობის (სიახლის, აკადემიური კეთილსინდისიერების ნორმების და სტილის, კვლევის ეთიკის ნორმების დაცვის) შესახებ;

დ) ილიას სახელმწიფო უნივერსიტეტის ხარისხის უზრუნველყოფის სამსახურის და შესაბამისი დარგობრივი კომისიის დასკვნები დოქტორანტის საერთაშორისო პუბლიკაციის/პუბლიკაციების ამ დებულების მე-6 მუხლით განსაზღვრულ მოთხოვნებთან შესაბამისობის შესახებ;

7.5 პროგრამის სტრუქტურიდან გამომდინარე, დოქტორანტს დაცვამდე უნდა ჰქონდეს შესრულებული მინიმუმ ერთი კოლოკიუმი წელიწადში.

7.6. სადისერტაციო ნაშრომის წარდგენასთან და დაცვასთან დაკავშირებული ვადები ასახულია ინდივიდუალური სადოქტორო პროგრამების ფარგლებში შემუშავებულ კალენდარში/მატრიცაში;

7.7. საერთაშორისო შეთანხმების ან/და სხვა პარტნიორული ხელშეკრულების შემთხვევაში, შესაძლებელია დადგინდეს ამ მუხლით 7.1 და 7.4. პუნქტებში განსაზღვრულისგან განსხვავებული პირობები.

მუხლი 8. რეცენზენტების შერჩევა, დამტკიცება და მათ მიერ სადისერტაციო ნაშრომის შეფასება

8.1. დოქტორანტის მიერ დისერტაციის და 7.4.-ში ჩამოთვლილი დოკუმენტების წარმოდგენის შემდეგ ფაკულტეტის ადმინისტრაცია მიმართავს შესაბამისი სფეროს დარგობრივ კომისიას ნაშრომისთვის რეცენზენტების და სადისერტაციო საბჭოს წევრების წარდგენის მიზნით. დარგობრივი კომისია გონივრულ ვადაში (მაქსიმუმ 2 კვირა) მიმართავს ფაკულტეტის საბჭოს სადისერტაციო საბჭოს ფორმირებისა და რეცენზენტების (მინიმუმ 2) ნომინირების მოთხოვნით; რეცენზენტებს შორის უნდა იყოს მინიმუმ 1 საერთაშორისო რეცენზენტი. საერთაშორისო რეცენზენტის დასკვნა სავალდებულო არ არის იმ შემთხვევაში, თუკი დოქტორანტს ჰყავს საერთაშორისო ხელმძღვანელი.

8.2. იმ შემთხვევაში, თუ სადისერტაციო ნაშრომი შესრულებულია ინგლისურ ენაზე, რეცენზენტებს უნდა ჰქონდეთ ინგლისური ენის კომპეტენცია. აღნიშნული კომპეტენციის დადგენის პასუხისმგებლობა ეკისრება დარგობრივ კომისიას;

8.2. რეცენზენტების ნომინირებისას დარგობრივი კომისია ხელმძღვანელობს შემდეგი მოთხოვნებით:

ა) ადგილობრივი რეცენზენტი უნდა იყოს ადგილობრივი უნივერსიტეტის, სამეცნიერო-კვლევითი ინსტიტუტის/ცენტრის პერსონალი (პროფესორი/ ასოცირებული პროფესორი/ასისტენტ-პროფესორი/ პროფესორ-ემერიტუსი/ მეცნიერ-თანამშრომელი), ხოლო საერთაშორისო რეცენზენტი - უცხოური უნივერსიტეტის, სამეცნიერო-კვლევითი ინსტიტუტის/ცენტრის პერსონალი, ან ემერიტუსის სტატუსის მქონე

პირი, რომელსაც აქვს დოქტორის აკადემიური ხარისხი, დოქტორანტის საკვლევი თემის შესაბამისი სამეცნიერო-კვლევითი გამოცდილება და დარგის სპეციფიკიდან და განვითარებიდან გამომდინარე, არის უახლესი ცოდნით აღჭურვილი, აქტიური მონაწილეობა აქვს მიღებული სამეცნიერო კვლევებში და ბოლო 3 წლის განმავლობაში საერთაშორისო ინდექსის მქონე რეფერირებად ჟურნალში გამოქვეყნებული აქვს მინიმუმ 1 სამეცნიერო ნაშრომი, რომელიც შეესაბამება დოქტორანტის სადისერტაციო ნაშრომის ზოგად თემატიკას/კვლევის სფეროს.

ბ) რეცენზენტებსა და დოქტორანტს შორის არ უნდა არსებობდეს ინტერესთა კონფლიქტი (მაგ. მიმდინარე პროექტებში თანამშრომლობა და სხვა), რაც რეცენზენტობის კანდიდატმა უნდა დაადასტუროს ხელმოწერილი წერილით;

8.3. რეცენზენტების შერჩევის პროცესში მონაწილეობას არ იღებენ დოქტორანტის ხელმძღვანელ(ებ)ი/თანახელმძღვანელი. რეცენზენტების ვინაობა უცნობი რჩება დოქტორანტისთვის მათი შეფასების მიღების მომენტამდე;

8.4. რეცენზენტების კანდიდატურები ნომინირების შემდეგ მტკიცდება ფაკულტეტის საბჭოს მიერ, რის შემდეგაც მათ ეგზავნებათ სადოქტორო ნაშრომი სიახლის და დაცვისთვის მზაობის შესაფასებლად;

8.5. რეცენზენტებს დასკვნის და უკუკავშირის მოსამზადებლად ეძლევათ გონივრული ვადა, მაქსიმუმ 1 თვე;

8.6. რეცენზენტების დასკვნები ეგზავნებათ დოქტორანტს, მის სამეცნიერო ხელმძღვანელ(ებ)ს, თანახელმძღვანელს და სადისერტაციო საბჭოს წევრებს;

8.7. რეცენზენტების ერთი ან ორივე დადებითი დასკვნის შემთხვევაში ინიშნება ნაშრომის საჯარო დაცვა, ხოლო რეცენზენტების ორი უარყოფითი დასკვნის შემთხვევაში, ნაშრომი უბრუნდება დოქტორანტს შემდგომი გადამუშავებისთვის მიცემული უკუკავშირის გათვალისწინებით. დოქტორანტმა უნდა წარადგინოს გადამუშავებული ნაშრომი მაქსიმუმ ერთი კალენდარული წლის განმავლობაში, მიუხედავად სტუდენტის სტატუსისა. აღნიშნული ვადის ამოწურვის შემდეგ, იმ შემთხვევაში, თუ დოქტორანტი არ წარმოადგენს გადამუშავებულ ნაშრომს ან განმეორებით წარმოდგენილი ნაშრომი მიიღებს რეცენზენტების ორ უარყოფით დასკვნას, დოქტორანტს აკადემიური ჩამორჩენილობის გამო უწყდება სტუდენტის სტატუსი.

მუხლი 9. ფაკულტეტის სადისერტაციო საბჭო

9.1. ფაკულტეტის სადისერტაციო საბჭო (შემდგომში - სადისერტაციო საბჭო) არის დოქტორის კვალიფიკაციის/აკადემიური ხარისხის მიმნიჭებელი ორგანო;

9.2. სადისერტაციო საბჭო იქმნება ყოველი კონკრეტული დისერტაციის განხილვისა და დოქტორის აკადემიური ხარისხის/კვალიფიკაციის მინიჭების მიზნით; სადისერტაციო საბჭოს ამტკიცებს ფაკულტეტის საბჭო დარგობრივი კომისიის წარდგინებით.

9.3. სადისერტაციო საბჭო შედგება ფაკულტეტის შესაბამისი დარგის/სპეციალობის პროფესორების, ასოცირებული პროფესორებისგან, დამოუკიდებელი სამეცნიერო-კვლევითი ერთეულის (ასეთის არსებობის შემთხვევაში) შესაბამისი დარგის/სპეციალობის უფროსი მეცნიერი თანამშრომლისა და მთავარი მეცნიერი თანამშრომლისგან, რომლებსაც აქვთ დოქტორის აკადემიური ხარისხი და რომელთა კვალიფიკაცია და კომპეტენცია იძლევა ნაშრომის სიღრმისეულად და სრულყოფილად შეფასების და კვლევის ორიგინალობისა და მისი შედეგების შეფასების შესაძლებლობას. სადისერტაციო საბჭოს შემადგენლობაში უზრუნველყოფილია გარე შემფასებლების მონაწილეობა. სადისერტაციო საბჭოს მუშაობაში არ მონაწილეობს დოქტორანტის ხელმძღვანელი/ ხელმძღვანელები, თანახელმძღვანელი და რეცენზენტები.

9.4. სფეროს თავისებურების გათვალისწინებით სადისერტაციო საბჭოს შემადგენლობაში საჭიროების შემთხვევაში, შედიან შესაბამისი კვალიფიკაციის და კომპეტენციის საერთაშორისო შემფასებელი/შემფასებლები, სამთავრობო/არასამთავრობო სექტორის, შრომის ბაზრის წარმომადგენლე(ებ)ი.

9.5. სადისერტაციო საბჭოს შემადგენლობაში შედის მინიმუმ ერთი გარე შემფასებელი, რომელიც უნდა იყოს დოქტორის აკადემიური ხარისხის მქონე ან მასთან გათანაბრებული შესაბამისი დარგის წარმომადგენელი მკვლევარი/აკადემიური პერსონალი/მეცნიერი თანამშრომელი, რომელსაც დარგის სპეციფიკიდან გამომდინარე, აქტიური მონაწილეობა აქვს მიღებული სამეცნიერო კვლევებში და გამოქვეყნებული აქვს სამეცნიერო ნაშრომი/ები, რომლებიც შეესაბამება დოქტორანტის სადისერტაციო ნაშრომის ზოგად თემატიკას/მიმართულებას. მისი მოწვევა უნდა მოხდეს შემდეგი წესის დაცვით: დარგობრივი კომისია მოიძიებს სადისერტაციო საბჭოს პოტენციურ წევრს და მისი წერილობითი თანხმობის შემთხვევაში, დამტკიცების მიზნით წარუდგენს ფაკულტეტის საბჭოს მის კანდიდატურას სადისერტაციო საბჭოს წევრობის სხვა კანდიდატურებთან ერთად;

9.6. მოწვეულ წევრთა რაოდენობა არ უნდა აღემატებოდეს სადისერტაციო საბჭოში უნივერსიტეტიდან წარმოდგენილ წევრთა რაოდენობას;

9.7. სადისერტაციო საბჭოს წევრობის კანდიდატთა სიას ფაკულტეტის საბჭოს დასამტკიცებლად წარუდგენს შესაბამისი დარგობრივი კომისია. ასევე, დარგობრივი კომისია ფაკულტეტის საბჭოს ასარჩევად წარუდგენს სადისერტაციო საბჭოს თავმჯდომარის კანდიდატურას და მისი არყოფნის შემთხვევაში თავმჯდომარის მოვალეობის შემსრულებლის კანდიდატურას.

9.8. იმ შემთხვევაში, თუ სადისერტაციო ნაშრომის შესრულება და დაცვა ხდება ინგლისურ ენაზე, სადისერტაციო საბჭოს წევრებს უნდა ჰქონდეთ ინგლისური ენის კომპეტენცია. აღნიშნული კომპეტენციის დადგენა და პასუხისმგებლობა ეკისრება დარგობრივ კომისიას.

9.9. ფაკულტეტის საბჭოს მიერ სადისერტაციო საბჭოს დამტკიცების შემდეგ, მისი შემადგენლობა ეცნობება დოქტორანტს და მის ხელმძღვანელს. შესაბამისი საფუძვლის არსებობის შემთხვევაში, დოქტორანტს/ხელმძღვანელს უფლება აქვს, აცილება მისცეს სადისერტაციო საბჭოს წევრს/წევრებს, რა

შემთხვევაშიც ის არგუმენტირებულ განცხადებას წერს ფაკულტეტის დეკანის სახელზე. განცხადება განიხილება დარგობრივი კომისიის მიერ დეკანის მონაწილეობით. მიღებული გადაწყვეტილება ეცნობება დოქტორანტს და მის ხელმძღვანელს. სადისერტაციო საბჭოს წევრი/წევრები შეიძლება შეიცვალოს იმ პრინციპით, რა პრინციპითაც ხდება სადისერტაციო საბჭოს შექმნა;

9.10. სადისერტაციო საბჭო გადაწყვეტილება უნარიანია, თუ მას ესწრება წევრთა სიითი შემადგენლობის ნახევარზე მეტი;

9.11. ფაკულტეტის საბჭოს მიერ დამტკიცებული სადისერტაციო საბჭო თავისი შემადგენლობიდან საბჭოს მდივანს ირჩევს ღია კენჭისყრით, რომელიც როგორც გადაწყვეტილება, აისახება სადისერტაციო საბჭოს ოქმში;

9.12. სადისერტაციო საბჭოს სხდომის მიმდინარეობა ფორმდება ოქმით, რომელსაც ხელს აწერენ საბჭოს თავმჯდომარე და მდივანი. ოქმს თან ახლავს ასევე, სადისერტაციო საბჭოს სხდომაზე დამსწრე წევრთა ხელმოწერები.

მუხლი 10. სადისერტაციო ნაშრომის შეფასება და დაცვა

10.1. დისერტაციის დაცვა არის საჯარო და ხდება სადისერტაციო საბჭოს წინაშე. დისერტაციის დაცვის შესახებ ინფორმაცია (ადგილი, დრო, თარიღი) ქვეყნდება უნივერსიტეტის ოფიციალურ ვებგვერდზე ნაშრომის დაცვამდე ერთი კვირით ადრე;

10.2. დისერტაციის დაცვის ენა არის ქართული, თუ დარგობრივი კომისიის გადაწყვეტილებით, საერთაშორისო შეთანხმებით ან/და სხვა პარტნიორული ხელშეკრულებით სხვა რამ არ არის დადგენილი;

10.3. დისერტაციის დაცვის პროცესის ხანგრძლივობას და რეგლამენტს ადგენს სადისერტაციო საბჭო;

10.4. დისერტაციის დაცვის პროცესი ითვალისწინებს დოქტორანტის მიერ ნაშრომის წარდგენას, რეცენზიების მოსმენას, სამეცნიერო კამათს და სადისერტაციო საბჭოს გადაწყვეტილებას;

10.5. ხელმძღვანელს აქვს დისერტაციის დაცვაზე დასწრების უფლება, თუმცა ის არ მონაწილეობს დაცვის პროცესში. დისერტაციის და დოქტორანტის შესახებ ის მოსაზრებას გამოთქვამს იმ შემთხვევაში, თუ სადისერტაციო საბჭო მას შეკითხვით მიმართავს;

10.6. სადისერტაციო ნაშრომი ფასდება ილიას სახელმწიფო უნივერსიტეტის სტუდენტთა/პროფესორულ სტუდენტთა შეფასების, კრედიტების მინიჭების, რეიტინგისა და დამატებით/განმეორებით კურსებზე/კომპონენტებზე თანხის გადახდის განსაზღვრის წესის შესაბამისად.

10.7. სადისერტაციო საბჭოს მიერ ნაშრომის შეფასებისთვის გამოიყენება შესაბამისი კრიტერიუმები, რომელიც განსაზღვრულია ინდივიდუალური სადოქტორო პროგრამების დოკუმენტებში;

10.8. სადისერტაციო ნაშრომის შეფასება მიმდინარეობს შემდეგი სისტემით:

ა) ფრიადი (summa cum laude) – შესანიშნავი ნაშრომი;

ბ) ძალიან კარგი (magna cum laude) – შედეგი, რომელიც წაყენებულ მოთხოვნებს ყოველმხრივ აღემატება;

გ) კარგი (cum laude) – შედეგი, რომელიც წაყენებულ მოთხოვნებს აღემატება;

დ) საშუალო (bene) – საშუალო დონის ნაშრომი, რომელიც წაყენებულ ძირითად მოთხოვნებს აკმაყოფილებს;
ე) დამაკმაყოფილებელი (rite) – შედეგი, რომელიც, ხარვეზების მიუხედავად, წაყენებულ მოთხოვნებს მაინც აკმაყოფილებს;

ვ) არადამაკმაყოფილებელი (insufficient) – არადამაკმაყოფილებელი დონის ნაშრომი, რომელიც ვერ აკმაყოფილებს წაყენებულ მოთხოვნებს;

ზ) სრულიად არადამაკმაყოფილებელი (sub omni canone) – შედეგი, რომელიც წაყენებულ მოთხოვნებს სრულიად ვერ აკმაყოფილებს.

10.9. სადისერტაციო საბჭოს წევრების მიერ სადისერტაციო ნაშრომის შეფასება ხდება წევრთა მსჯელობისა და კონსენსუსის გზით, რეცენზენტების დასკვნების გათვალისწინებით;

10.10. სადისერტაციო საბჭოს მსჯელობას და საბოლოო შეფასებაზე შეთანხმებას არ ესწრება არცერთი გარე პირი, მათ შორის ფაკულტეტის ადმინისტრაციის წარმომადგენელიც;

10.11. შეფასებას აცხადებს საჯაროდ სადისერტაციო საბჭოს თავჯდომარე.

10.12. თუ დოქტორანტმა მიიღო უარყოფითი შეფასება - „არადამაკმაყოფილებელი“ (insufficient) – არადამაკმაყოფილებელი დონის ნაშრომი, რომელიც ვერ აკმაყოფილებს წაყენებულ მოთხოვნებს“, მან გადამუშავებული ნაშრომი უნდა წარადგინოს ერთი კალენდარული წლის განმავლობაში, მიუხედავად სტუდენტის სტატუსისა. აღნიშნული ვადის ამოწურვის შემდეგ, იმ შემთხვევაში, თუ დოქტორანტი არ წარმოადგენს გადამუშავებულ ნაშრომს, დოქტორანტს აკადემიური ჩამორჩენილობის გამო უწყდება სტუდენტის სტატუსი. ხოლო, თუ დოქტორანტმა მიიღო შეფასება - „სრულიად არადამაკმაყოფილებელი“ (sub omni canone) – შედეგი, რომელიც წაყენებულ მოთხოვნებს სრულიად ვერ აკმაყოფილებს“ მან უნდა წარადგინოს ახალი ნაშრომი სადისერტაციო საბჭოს მიერ დადგენილ ვადებში. იმ შემთხვევაში, თუ დოქტორანტი არ წარმოადგენს ახალ ნაშრომს დადგენილ ვადებში, მას შეუწყდება სტუდენტის სტატუსი აკადემიური ჩამორჩენილობის გამო.

10.13. პუნქტით 10.2 გათვალისწინებული უფლების გამოყენების შემდეგ, გადამუშავებული ნაშრომის/ახალი ნაშრომის თაობაზე სადისერტაციო საბჭოს მიერ ისევ უარყოფითი გადაწყვეტილების მიღების შემთხვევაში, დოქტორანტს უწყდება სტუდენტის სტატუსი სწავლის შედეგების მიუღწევლობის გამო;

10.14. პარტნიორული, ადგილობრივი ან საერთაშორისო თანამშრომლობის შემთხვევაში, დისერტაციის დაცვის ორგანიზების საკითხი დარეგულირდება საერთაშორისო, ადგილობრივი, ან საპარტნიორო შეთანხმებით.

მუხლი 11. ადმინისტრაციული მხარდაჭერა

11.1. სადისერტაციო საბჭოს და დარგობრივი კომისიების ადმინისტრაციულ მხარდაჭერას ისევე, როგორც ყველა სახის საქმისწარმოებას უზრუნველყოფს ფაკულტეტის ადმინისტრაცია.

მუხლი 12. მობილობა დოქტორანტურაში

- 12.1. დოქტორანტურაში პირი შეიძლება ჩაირიცხოს მობილობით საქართველოში მოქმედი კანონმდებლობისა და საუნივერსიტეტო წესის მიხედვით, პროგრამის წინაპირობების დაცვით;
- 12.2. ჩარიცხვისა და კრედიტების აღიარების შესახებ გადაწყვეტილებას იღებს ფაკულტეტი და მიღებულ გადაწყვეტილებას წარუდგენს რექტორს;
- 12.3. იმ შემთხვევაში, თუ სტუდენტი ახორციელებს საერთაშორისო მობილობას, სასწავლო კომპონენტის ფარგლებში, მას უფორმდება შესაბამისი შეთანხმება (learning agreement). პროგრამის კომპონენტებში შეთანხმებით განსაზღვრული კრედიტების გათვალისწინება ხდება განათლების ხარისხის განვითარების ეროვნული ცენტრის მიერ კრედიტების აღიარების შემდეგ. იმ შემთხვევაში, თუ დოქტორანტი ახორციელებს საერთაშორისო მობილობას კვლევითი კომპონენტის ფარგლებში, მან ფაკულტეტზე უნდა წარადგინოს თავისი ხელმძღვანელის და თანახელმძღვანელის მიერ ხელმოწერილი კვლევის გეგმა (research agenda);
- 12.4. პარტნიორული, ადგილობრივი ან საერთაშორისო თანამშრომლობის შემთხვევაში, შესაძლებელია დადგინდეს ამ მუხლით განსაზღვრულისგან განსხვავებული პირობები.

მუხლი 13. ხარისხის მინიჭება და გამოქვეყნების ვალდებულება

- 13.1. დოქტორანტს აკადემიურ ხარისხს/კვალიფიკაციას ანიჭებს სადისერტაციო საბჭო;
- 13.2. დოქტორანტს შეუძლია სადისერტაციო საბჭოს მიერ მიღებული გადაწყვეტილება გამოცხადებიდან 10 სამუშაო დღის ვადაში გაასაჩივროს მიღებული შეფასება ფაკულტეტის დეკანთან წერილობითი საპრეტენზიო განაცხადით, სადაც დასაბუთებული იქნება გასაჩივრების მიზეზი და დასახელებული იქნება ის პროცედურული დარღვევები, რომელიც საფუძვლად უნდა დაედოს შეფასების გადახედვას;
- 13.3. ფაკულტეტის დეკანი იხილავს საპრეტენზიო განაცხადს შესაბამისი სფეროს დარგობრივ კომისიასთან. დარგობრივი კომისია წყვეტს, არსებობს თუ არა ნაშრომის განმეორებით განხილვის მიზეზები და ასეთის არსებობის შემთხვევაში არგუმენტირებულად უზღავნის სადისერტაციო საბჭოს შემდგომი შეფასებისთვის.
- 13.4. ფაკულტეტის ადმინისტრაცია ვალდებულია, დისერტაციის დაცვის და კვალიფიკაციის მინიჭების შემდეგ ერთი თვის ვადაში ატვირთოს დისერტაცია უნივერსიტეტის/ფაკულტეტის ვებგვერდზე;
- 13.5. დოქტორის აკადემიური ხარისხის/კვალიფიკაციის დამადასტურებელი დიპლომი გაიცემა დისერტაციის უნივერსიტეტის ვებგვერდზე ატვირთვის შემდეგ.
- 13.6. მიმდინარე სადისერტაციო ნაშრომების თემატიკის შესახებ და დაცული დისერტაციების შესახებ ინფორმაცია განთავსდება ერთიან ელექტრონულ პორტალზე, მისი ამოქმედების შემდეგ.

მუხლი 14. დავები

- 14.1. გასაჩივრების პროცედურა.

დოქტორანტურაში სწავლის პროცესში წარმოქმნილ ნებისმიერ პრობლემას, დეკანის სახელზე წარგგენილი წერილობითი განცხადების საფუძველზე, განიხილავს დარგობრივი კომისია.

მუხლი 15 დოქტორანტის სტატუსის შეწყვეტა/შეჩერება

15.1. დოქტორანტის სტატუსის შეჩერება ხდება ილიას სახელმწიფო უნივერსიტეტში სტუდენტის/პროფესიული სტუდენტის სტატუსის მარეგულირებელი წესის შესაბამისად.

15.2. დოქტორანტის სტატუსის შეწყვეტა ხდება ილიას სახელმწიფო უნივერსიტეტში სტუდენტის/პროფესიული სტუდენტის სტატუსის მარეგულირებელი წესის შესაბამისად და ქვემოთ მოცემულ შემთხვევებში:

ა) აკადემიური ჩამორჩენილობის გამო, რაც გულისხმობს:

ა.ა. დოქტორანტის მიერ ზედიზედ ორჯერ პროსპექტუსის დაუცველობას,

ა.ბ. კოლოკვიუმის ორჯერ შეუსრულებლობას,

ა.გ. გასაჩივრების შემდეგ სადისერტაციო საბჭოს მიერ უარყოფითი გადაწყვეტილების მიღების ძალაში დატოვების შემთხვევაში, დისერტაციის დაცვის შედეგად ორჯერ არადამაკმაყოფილებელი შეფასების მიღებას გადამუშავებული ნაშრომის წარმოდგენლობას 10.12 პუნქტში სანჭპს მიერ დადგენილ ვადებში.

ა.დ. რეცენზენტების ორი უარყოფითი დასკვნის შემთხვევაში, მაქსიმუმ ერთი კალენდარული წლის განმავლობაში, დოქტორანტის მიერ გადამუშავებულ ნაშრომის წარმოდგენლობას ან განმეორებით წარმოდგენილი ნაშრომზე რეცენზენტების ორი უარყოფითი დასკვნის მიღებას.

ბ) თუ დოქტორანტის მიერ დარღვეულია უნივერსიტეტში მოქმედი ეთიკის კოდექსი და სხვა საუნივერსიტეტო წესები;

გ) თუ დადასტურდა პლაგიატის ან მონაცემების გაყალბების შემთხვევა,

დ) თუ დოქტორანტი ვერ შეასრულებს პროგრამით გათვალისწინებულ მოთხოვნებს დამატებითი ერთწლიანი ხელშეკრულების დასრულების შემდეგ.

მუხლი 16. დოქტორის აკადემიური ხარისხის ბათილობა

16.1. სადოქტორო პროგრამის კურსდამთავრებულის მხრიდან აკადემიური და კვლევითი ეთიკის ნორმების დარღვევის შემთხვევები განიხილება დარგობრივი კომისიის მიერ;

16.2. დარგობრივი კომისია, საჭიროების შემთხვევაში, შუამდგომლობით მიმართავს ფაკულტეტის საბჭოს, რათა მან შექმნას სადისერტაციო საბჭო, რომელიც იმსჯელებს დოქტორის აკადემიური ხარისხის/კვალიფიკაციის ბათილად ცნობის შესახებ.

მუხლი 17. დოქტორანტურაში სწავლის საფასური

17.1. სადოქტორო პროგრამის მოთხოვნების ამ მუხლის 17.3 პუნქტში გაწერილი ვადების შესაბამისად დაკმაყოფილების შემთხვევაში, საქართველოს მოქალაქისთვის დოქტორანტურაში სწავლა უფასოა 5 წლის განმავლობაში. სწავლა ფასიანია უცხო ქვეყნის მოქალაქისთვის გარდა გამონაკლისი შემთხვევებისა. შესაძლებელია აგრეთვე, დოქტორანტურაში მიღება გამოცხადდეს ფასიან ადგილებზე;

17.2. დოქტორანტურაში სწავლის შესაბამისი სემესტრიდან სადოქტორო პროგრამის მოთხოვნების ვადაში შეუსრულებლობისას ამ მუხლის 17.3 პუნქტის შესაბამისად ან სწავლის მეექვსე წლიდან დოქტორანტმა უნდა გადაიხადოს იმ დროისათვის დადგენილი სწავლის საფასური;

17.3. თუ დოქტორანტს ჩარიცხვიდან და სწავლის დაწყებიდან 1 წლის შემდეგ არ ექნება დაცული პროსპექტუსი და სწავლის მე-8 სემესტრის ბოლოს არ აქვს გამოქვეყნებული სულ მცირე ერთი პუბლიკაცია მოთხოვნების შესაბამისად, მან უნდა გადაიხადოს სწავლის საფასური ყოველი შემდეგი სემესტრისათვის უნივერსიტეტში დადგენილი საფასურის რაოდენობითა და წესით. იმ შემთხვევაში, თუ სტუდენტი პროგრამით გათვალისწინებული მოთხოვნების შესრულების მიზნით, 5 წლის შემდეგ დამატებით აფორმებს ერთწლიან ხელშეკრულებას, მას ეკისრება სწავლის გადასახადი ხელშეკრულების გაფორმების დროისთვის განსაზღვრული სწავლის გადასახადის ოდენობით. იმ შემთხვევაში, თუ სტუდენტმა ვერ შეასრულა პროგრამით გათვალისწინებული მოთხოვნები დამატებითი კონტრაქტის დასრულების შემდეგ, მას უწყდება სტუდენტის სტატუსი.

მუხლი 18. გარდამავალი დებულებები .

18.1. ამ დებულების 6.3 პუნქტით განსაზღვრული მოთხოვნების (სამეცნიერო პუბლიკაციის პირველი ან მეორე ავტორობა, შესაბამისობა სადისერტაციო ნაშრომთან) დაკმაყოფილებისაგან შეიძლება გათავისუფლდეს:

ა) 2008 წლის 20 მარტიდან 2015 წლამდე ჩარიცხული ყველა მიმართულების დოქტორანტი, რომელიც წარმოადგენს 6.1 პუნქტით განსაზღვრულ ჟურნალებში გამოქვეყნებულ 2 (ორ) სამეცნიერო სტატიას;

ბ) 2008 წლის 20 მარტამდე ჩარიცხული ყველა მიმართულების დოქტორანტი, რომელიც წარმოადგენს 6.1 პუნქტით განსაზღვრულ ჟურნალებში გამოქვეყნებულ 1 (ერთ) სამეცნიერო სტატიას.

18.2. პროგრამით განსაზღვრული სწავლის ვადის ამოწურვის შემთხვევაში, 2015 წლამდე ჩარიცხულ დოქტორანტებთან ახალი ხელშეკრულების გაფორმების შემდეგ ამოქმედდეს წინამდებარე დებულების მე-6 მუხლით განსაზღვრული მოთხოვნები.

18.3. ბიზნესის და ადმინისტრირების და განათლების მიმართულების პროგრამების დოქტორანტებს, რომლებიც ჩარიცხნენ სადოქტორო პროგრამებზე 2024 წლის 1 აგვისტომდე და 2025 წლის 1 იანვრის მდგომარეობით ჰქონდათ სტუდენტის აქტიური სტატუსი ან მიმართავენ ფაკულტეტს სტუდენტის სტატუსის აღდგენის განცხადებით 2025-2026 სასწავლო წლის დამთავრებამდე არ ეხებათ 6.1 და 6.2-ში განსაზღვრული გამოქვეყნების ვალდებულება. დისერტაციის დაცვამდე ბიზნესის და ადმინისტრირების და განათლების მიმართულების

პროგრამის დოქტორანტს შესაბამის სფეროში გამოქვეყნებული (ან ჟურნალის რედაქციისგან მიღებული გამოსაქვეყნებლად) უნდა ჰქონდეს მინიმუმ ერთი სამეცნიერო სტატია საერთაშორისო (უცხოურ) რეფერირებად თემატურ ჟურნალში/ჟურნალებში, რომლებიც აღიარებულ საერთაშორისო ნუსხებშია შესული (Clarivate Analytics (ყოფილი Thomson Reuters) Master Journal List, Scopus, Ulrich's Index, ERIH PLUS, EBSCOHost, Latindex Catalogue) სამეცნიერო პუბლიკაციაში მითითებული უნდა იყოს ილიას სახელმწიფო უნივერსიტეტის სახელი;

18.4. წინამდებარე დებულების 4.3., 5.4. და 8.1 პუნქტებში განსაზღვრული ხელმძღვანელის საკვალიფიკაციო მოთხოვნები, კოლოკვიუმის ვალდებულება, და საერთაშორისო რეცენზენტის დასკვნის ვალდებულება არ ეხება იმ დოქტორანტებს, რომლებიც ჩაირიცხნენ ფაკულტეტის სადოქტორო პროგრამებზე 2024 წლის 1 აგვისტომდე და 2025 წლის 1 იანვრის მდგომარეობით ჰქონდათ სტუდენტის აქტიური სტატუსი ან მიმართავენ ფაკულტეტს სტუდენტის სტატუსის აღდგენის განცხადებით 2025-2026 სასწავლო წლის დამთავრებამდე.